

ТЕХНИКАЛЫҚ МАМАНДЫҚТАРҒА ГРАНТ САНЫ КӨБЕЮДЕ, ҚАПЫ ҚАЛМАҢЫЗ!

Дүние жүзінде екі мыңнан астам мамандық болса, заман талабына сай олардың бірі жойылып, бірінің мазмұны өзгеріп, енді бірі жаңадан пайда болып жатады. Мәселен, индустриялық бағдарламаны жүзеге асыра бастаған тұста бізде инженерлер ең құрметті мамандық саналды. Қаржы дағдарысына дейін мұнайдың бағасы жоғары болған кезде мұнай-газ саласы мен жалпы экономикаға, бизнеске бет бұрған жастар көбейді. Шетелдік компанияларда жұмыс істейтіндердің жалақысы жоғары болған кезде кейбіреулер шет тілін меңгеруге кіріссе, ал бүгінгідей индустриялық-инновациялық бағдарламалар жүзеге асырыла бастаған тұста бізге техника тілін меңгерген мамандар қажеттілігі туындады.

Кәсіби біліктілігі жоғары маман қай кезде де сұранысқа ие. Әсіресе, бүгінгідей инновациялық-индустриялық даму бағытын ұстанған еліміз үшін техникалық және кәсіптік білімі бар мамандар мен заман талаптарына жауап беретін жаңа мамандықтар бойынша орта буын кадрларды даярлау – күн тәртібіндегі басты мәселе.

Мемлекет басшысы Қасым-Жомарт Тоқаев та техникалық мамандарды көбейтуге мән беріп отыр. Президент тапсырмасына сәйкес, 2025 жылға қарай жастардың 100

пайызы сұранысқа ие мамандықтар бойынша тегін техникалық және кәсіптік біліммен қамтамасыз етіледі екен.

Осы ретте Шымкент қаласындағы М.Әуезов атындағы мемлекеттік университеттің техникалық мамандықтар даярлауда орасан зор жетістіктерге жеткенін айта кеткім келеді. Бүгінгі таңда М.Әуезов атындағы Оңтүстік Қазақстан мемлекеттік университеті - Қазақстан Республикасының ірі және көпсалалы университеті, аймағымыздың инфрақұрылымының дамуы мен қалыптасуына, халықаралық қоғамдастықтағы интеграция мен жаһандану үрдістеріне белсенді қатысатын ғылыми-білім беру, интеллектуалдық, мәдени орталығы. Университет Қазақстанның оңтүстігіндегі 65 жылдан аса тарихы бар жоғары техникалық және гуманитарлық білім берудің екі үлкен мектебінен құралады. Білім және ғылым министрі Асхат Аймағамбетовтың айтуынша, осы уақытқа дейін 60 мыңға жуық гранттың 40 пайызы техникалық мамандықтарға бейімделген болса, биыл нарық сұранысына сай гранттар үлесі көбейтіледі екен. Яғни аталған мамандықтарға бөлінетін грант саны 60 пайызға дейін артады.

Демек биыл мектеп бітіретін түлектер мамандық таңдарда технология саласын тандаса, мемлекеттік грантты жеңіп алуына мүмкіндік мол. Бұл ретте біз мектеп бітіруші түлектерді еліміздегі ең ірі оқу орындарының бірі – М.Әуезов атындағы университетте білім алуға шақырамыз.



Елімізде жан-жақты білім аламын деген жастарға мемлекет тарапынан барынша қолдау көрсетілуде. Әйтсе де жоғары оқу орнын бітіргендердің арасында таңдап алған мамандығы бойынша жұмыс таппай, құрылыста, базарда немесе басқа да салаларда жұмыс істеуге мәжбүр болып жүрген адамдар жетерлік. Гуманитарлық сала бойынша жоғары оқу орындарын бітірген бірқатар жастар жұмыстың жоқтығынан кәсіптік-техникалық оқу орындарында қайта даярлықтан өтуде. Сондықтан мамандық таңдау барысында талапкер де, ата-ана да жақсылап ойланғаны дұрыс. Әркім өз кәсібінің шебері болуы үшін үлкендер жағы мамандық таңдау адам өміріндегі маңызды кезеңдердің бірі екенін ескеріп, балаларын «модный» салаларға итермелей бермей, оның өзі қалайтын, жанына жақын мамандықты таңдауына мүмкіндік бергені жөн.

Біздің университеттің есігі мектеп бітіруші түлектер үшін әрдайым ашық, келіңіздер! Сапалы білім, саналы тәрбие беріп, мықты маман даярлаудан ешқашан жалықпаймыз!

Роза БЕКТЕНОВА,
М.Әуезов атындағы ОҚУ, техникалық
мамандықтар бойынша практикалық орыс тілі
сафедрасының оқытушысы.